

Mölderhannes

All lange Jöhren sin vergohn
wie an den Berg die Möll noch stohn,
on die Flögels Stond för Stond
gungen flitteg ömmer rond.
On Dag för Dag dat Mahlwerk liep
on wor nur stell wenn de Wend mol schlief.
Ken Möll on Möllenberg mehr steht,
ken Möllenflögel sech mehr dreht.
Ok Mölderhannes lewt nit mehr
et es all lange Jöhren her.



Mühle in Voerde-Stockum

H. Ufermann

Mölderhannes, wie die Älderen van ons öhm kennen, dej inne Möll helpen. Heij nohm die Säck met Rogg, Weit on Gass van die Buren an, trock die Säck hoch on liet se met dat gemahlene Mehl wer heronder. Et kom ok vör, dat et Korn nit fottens gemahlen wodden kos, weil ken Wend weihjden on die Möllenflögels stell stohnen. Dann sag Hannes ömmer: „Wej hemmen ken Wend, wej hemmen ken Wend!“ Dumols gow et noch ken elektrische Maschinen on son Krom. Et kom op de Wend an. Man kek in't Weer, äwer dovan gow et ken Wend. On wenn die Buren et noch so drock hadden, sej mossen ma wachten on die Säck met et Korn inne Möll loten. Wenn dann die Möll wer Wend hat on et Korn gemahlen wor, spannden Hannes de ahle Krak van Perd inne Möllekarr on broch die Mehlsäck met hü on hot no de Buren. Heij freuden sech wie en klein Blag, wenn heij en paar bonte Beldjes kreg. Heij hat ok en Gemüt wie en Kend.

Jeden Sonntag gung Mölders Hannes inne Kerk. Heij wor all frug dor, dormet heij sine Platz kreg. Kot no et este Lügen kom heij met et grote Gesangbuk onder den Ärm angeschlofft. Heij sat sech mots op de Platz anne Trappenposs inne kotte Bank. Dor sot heij ömmer on kos sech ane Poss so schön anlegen. Et dürten nit lang on die Döpp fielen öhm tu. Heij stohn well met op, wenn de Pastor inne Kerk kom, äwer van die Prek kreg heij nit völ met. Heij bekeek sech van bennen oder heij gung in sech, wie et de Pastor so schön inne Prek gesag hat.

Wor de Pastor met de Prek an't End wor Hannes fottens wacker on song dat Amen drijmol met. Dann sükten heij en Peneg för de Klengelbühl on twee Peneg för op den Telder on mik dat heij no Hus kom. De Hus wodden heij dann gefrog: „Woröwer hät de Pastor dann geprekt?“ Hannes sag dann: „Ower de Sönd.“ „Wat hät heij dann öwer de Sönd gesag?“ wollen se weten. „Wej sollen se nit dun“, sag Hannes on dat wor alles wat man üt öhm herrüt kriegen kos. Völ Wend sot bej Hannes nit drachter. Wenn de Möll ken Wend hat, sot Hannes de Hus on bekeek sech sine bonte Beldjes on wor met sin Lewen defrejen. Et wodden met öhm ok ömmer wenneger mit de Verstand on ok so. Eenes gujen Dages mik Hannes für ömmer de Döpp tu.

Die Möllenflögels hadden ken Wend on Hannes wor an't guje End. On wenn mej eenen frog, wat met de Möll passiert es? No de este Weltkrieg hät sech de Mölder en Sprengmeister van de Lohberger Pött besörjt on denn hät die Möll met die decke Muren inne Loff gesprengt. Van die völe Steen hät de Mölder drij Hüser bauen loten on die stond van Dag noch.

Hermann Schneider, Bucholtwelmen.